

茅鹿門先生文集

茅鹿門先生文集卷之九

歸安茅坤順甫著

書

復王肖華溧陽書

使者持手札併及分俸之賜感媿感媿溧陽者江南繁劇之邑中多勢家鉅室盤錯紛結蓋仕路間之羊腸鳥道而難爲騏驥驂騑之縱步而蹀躞者兄丈何以抱琴而過茲邑也豈當路有故知兄丈下邳之材者而廼借之以彈壓剗割耶前令潘李二公俱僕姻家其所從簿書賦訟間並知自好者

而今卒爲邑之狡獪譏險者所構雖然兄丈之鋒
鏦譬則青萍太阿而其器度則又萬斛之舟也古
稱名令有王氏青箱者願兄丈直須虛其心平其
氣於一切辛甘燥濕震撼擊撞處曲爲調劑而鎮
之異日者兄丈固當爲國家建非常勲而區區百
里不足以盡蜀之士元也僕拭目以俟

復趙定宇少宰手劄

溧陽遣使函公手書併及機杼謝謝 聖天子
當陽而疆場多烽燧之跡執政間一切盤錯紛結
殊爲鞅掌而公之材望行且拜相傳麻矣語曰世

亂則急介冑之士時平則推譽望之賢僕獨謂茲二者公所當日夕刺心而無間於世與時之相升降者如何如何王溧陽綽有父風區區百里非所以展驥足者溧陽號爲巖邑而難治王兄雖辱千里騷裹然而入羊腸懸度之險恐亦難以飾驥而騁轡也公領中朝倘有故知門生宦遊江以南者須仗公憐世講且從高岡之上無忘順風而呼也縉兒令章丘五年所叨薦剡者二十餘上而三齊間百八州縣企且遵章丘所次科條而例行之歲首吏部注下考間聞章丘父老赴闕上疏訟寃者

三百餘輩然爲納言所滯亦無繇達之宸聰不
知公及聞否兒且憐僕年垂八十方以解綬爲幸
惟朝夕父子相師友讀書績文而已知屬公垂念
故併附聞不盡

與徐司諫龍寰書

數閱邸報獲明公所上封事一一切名實中肯綮
而於國家大計無不可席之施行真古之補闕拾
遺也西夏叛卒不啻唐安史朱泚之變而當事者
方其首難時倘及赴焚拯溺則疾雷不及掩耳從
中開誠布公待之以不灰茲固倣張乖崖之定蜀

亂寇萊公之鎮澶淵或及戡亂定焚也已而僭號
毀制漸聞于朝朝且按部覆徵兵白羽四馳復出
內帑數十萬金以厲戎行其聲固震疊烜赫而哮
許諸酋自分必死譬則檻虎也計出無聊愈亟愈
亂而况城高且堅當事者雖頓兵十萬而內困於
樓櫓之咆哮外疲於胡虜之騷驛春以來迄無成
功蓋有以也兼之倭夷內訌朝鮮且破而遼陽一
帶又在唇亡齒寒之間矣僕雖老於丘壑間不能
不深杞人漆室之憂所望公輩出石畫以鎮緩亟
發紆謨以匡國家者耿耿也僕離丹徒已四十年

而縣中故鄉宦唐公默菴孝廉本末公在縣時曾
及稔聞之否丹徒賢士大夫故多而唐公爲最其
以宦遊二十餘年而病亡旅邸歿無以爲殮殮無
以爲葬無寸土尺椽以遺其後僕曩故力爲拮据
周旋其間大略已備所寄高少府春字公書中錄
其副以上不敢再贅公之甘棠之愛在丹徒不啻
什且伯於僕者况公方首諫垣郡二千石以下無
不嚮風慕誼高崗之上順風以呼山谷金應者也
茲特憐唐氏之遺孤上不能守祖祠下不能葬父
骸而特以故三院所優給丹陽廢寺者之田而爲

地方狡獪者所魚肉而奪之敢以哀鳴於舊令尹之側公倘於中或及授之持節使及郡縣大夫之間公之德且世世矣

與石東泉司馬書

公柄司馬來中朝之士南下者無不嘖嘖聲稱當與先輩馬文升余子俊劉大夏諸公等其所規畫次第僕不能盡知而年雖衰老不能不聞鷄起舞也近數讀邸報頗知寧夏督府所牒報並不聞措置肯綮而招安一節獨聞我公持之可謂深獲要領矣夫招安者不得已之計也此特可行之於始

叛之初而決不可行之於遣將之久方其始叛一時部曲跋扈稱亂督府諸公倘能從呼吸間開誠布公在外鎮則借

天子之恩威而陽假之以

浩蕩在叛卒則仗帥府之調儻而陰藉之以解焚是或一策若既經督府疏其事於朝而

天子

且爲徵兵遣將彼猶肆然狼跋而焚燬制書則其不臣之罪殆有甚於唐末之藩鎮者已海內三尺豎子無不怒髮裂眦而願爲死綏者督鎮諸公其能拱手而聽之乎或疑當事者以師老堅城之下不得已徯借此以懈其死鬪之氣而兵家所謂用

而示之不用且從而奮擊之也六七月來於今未
聞定算未睹成功如何如何 明旨切責至再至
三而我公所從中布畫激勵戎行謂之千鈞之弩
矢不虛發矣今且若此不知我公何以收之泉石
間不勝漆室之憂幸有以示慰

與崇德令王鍾嵩書

崇德縣二百年來封以內文章則推貝公瓊節義
則推程公本立至於勲名則推潘公藩潘公所當
成化弘治間以素絲羔羊之操累官刑部尚書而
出督兩廣則斬馘萬級其威名與韓襄毅等已而

逆瑾銜之奪其功而反褫其爵其沒也無以爲殯
且殮故廬三楹且缺其一角甚矣其賢且廉可以
師百世而冠人羣者僕不肖所娶婦與其公子所
娶婦爲女兄弟故獲習知尚書公本末數十年來
前令公憫其先賢之裔而貧故壁立轍復其家今
其孫文弱特甚乃爲里人駕之役何異驅麋鹿而
服之鹽車也僕之衰老遽干典謁蓋痛孫叔敖之
後而行歌負薪於市耳唯明公垂諒而寬假焉

○ 與淮安周經府書

方外友雷道士客遊淮上爲惡少年所窘縛而羅

織之以獻於官司或傳其困且死矣頃忽破衲肩
瓢而過僕榻於是攜之且泣且喜問其故曰吾之
困且死者什之九而幸其所發官司則淮安經府
周公故得以脫以至於今茲特爲書以謝而併詳
雷道士所共從遊者本末聞之左右雷山東汶上
人也少浮家爲道士從異人者黃髮髻西遊荆襄
武當山中衣食於賣藥間遇貧者則出橐裝以分
之或飢且寒則襦其衣傾其瓢所貯而捐之不惜
也蓋澹宕自好者十五年前過湖中湖中人異之
及扣其所得或習熊經鳥伸及一切吐納導引之

術彼皆不之語也間探棋局亦稍稍解者然於世之緇塵則蛻遺也久矣僕故愛其人而結一茅庵以棲之往來者十餘年數好子遊江海上或貧者見其好施易與輒從之遊且稱願爲弟子併代爲負囊與擔而爨也雷亦不辭然亦往往爲其所鬼瞰而竊貲以去彼特笑而不復蹤且追之如此者屢矣僕間亦數以戒彼彼第曰吾本無家亦何處不可家何暇絮絮問所從也乃卒爲從遊者所誑誤問其姓曰胡大漢而不告以名也問其家世所從曰父母早亡而貧無活願從師走方賣藥於是

聽其隨之而過僕所舊棲茅庵中絮月矣未幾
雷賣藥橐有二三金於是夜竊之以逃雷亦不
計行且告還山東也僕稍稍助之裝以歸又憐其
莫爲之負擔也而隣有僮請隨之以行蓋壬辰年
七月間也及抵淮忽被惡少輩縛之稱曰此胡大
漢黨與也向詐奪人財者併縛所隨僮送之淮安
府已而檄送明臺幸公扣其詳解其裝獲僕所贈
詩卷廼爲大笑而遽釋之嗟乎明公於僕未之面
者而廼爲愛其人併憐其客遊者之無辜也脫之
以歸僕何以爲報而亦何敢忘哉敢具書上陳外

詩文刻數十卷中有原贈雷之詩什惟賜之清覽
焉

與許敬庵中丞商推海上事宜書

兵家曰知彼知己百戰不殆今喧傳關白者不知
其何許人頃者襲破朝鮮州郡而中朝所遣將提
兵二千以赴之又並覆沒以故中外洶洶且疑其
內犯而建言者或策其繇鴨綠江入犯天津一帶
或又虞其南抄登萊淮海之間又以閩浙所故嘗
罹倭夷焚劫者而近日人情亦風翔而海沸矣僕
妄測么麼必不能有他者但 中朝之疏已屢而

公今出督閩州則其事之緩亟險夷金屬幕下公
不得不爲措置矣僕竊籌數事不知公可採擇否
一曰首覘關白於海上所自爲注措何如其麾下
所用部將何如近者諜傳暹羅諸島且共爲犄角
以擣其虛其情形何如二曰海上所恃者順風而
帆我閩浙一帶須辦福艚船二三千料以上者數
百艘以逆之海上海上舊有上日本針經所載夷
內犯道路頗詳不知公獲覽睹否大抵海夷之入
犯必先於島嶼間停泊次第然後乘虛以及岸請
於前所建福艚船分哨而逆之海上然非可刀劍

攻擊也於中盛貯各色火砲如佛郎機法貢及銅將軍子母砲而我又外爲生牛皮帳及絮帷等項以護我士卒所嚮此則嚴陣而折衝以待之者也三曰前福艙船特可爲中軍而至於矢石之鬪須別爲八漿船俗號八喇烏數百號而中載荻柴火攻諸藥暗伏於島嶼隱處候其順風以帆而過也我反從上流尾而順風以燒之福艙船逆之於前八漿船夾擊而火攻之於後此則百戰百勝之策可以一舉而殪之者也至於擇敢戰之將選摧鋒之士先嚮導之審捐不貲之賞嚴必徇之誅而於

州郡從事及偏裨將校恐須一一布置不知公謂何如僕業欲移書以聞督府常公而猶未敢不審公可併爲面商之否

與施華江京兆書

僕少令青陽下車日卽得邑之雋若我華江不啻吳江南之於賈誼張成都之於蘇軾已而受事僅兩匝月輒以當路者所檄而校文淮陽蘇松間隨且奔喪來歸僕所欲爲縣興利除蠹奉法布職不及鑱畫尺寸甚矣僕之負九華山之靈也已而諸父老或稍憐僕所鰓鰓然問民疾苦而爲之拮据

其間者雖不及究其施行而其中所抱惻怛者固可亮也邑之吏民從而俎豆之嗟乎僕何以爲情而僕亦何以奮報知己也頃且年餘八十幾欲抱琴拄杖而再過焉一則登華江之堂連牀膝席共爲語次五十年來風塵荏苒處再則陟九華之巔且尋李白及他所仙遊者之蹤顧以衰颯猶爾留滯而邑有吳君者過宰璉市璉市者卽僕所近浮家處故及稍稍問華江起居知華江康食無恙僕不勝躍然喜竊欲爲之肘而飛也聊籍尺一展我契闊外有詩文續刻百餘卷獻上塵覽不盡欲言

與吳屏山太守書

客有詩畫友沈青門者之孫曰庇臨蓋世青門之業以遊江海間者也頃從維揚還僕因前問公政聲沈生亶亶不置口而曰維揚吏民家歌舞而戶俎豆之近世所僅見者已而又聞公於瓊花觀有深慨焉瓊花者誌稱玉蘂花世所絕無唐人嘗臺榭之而宋歐陽文忠又從而作無雙亭以賞之間嘗見之騷人墨子之咏歌而以世遠時移其頽且沒於礫石之間久矣而公以治郡之暇從而樹之以名花懸之以層閣得非先輩所稱揚州第一樓

乎沈生善繪事而於泉石花草間尤多神理茲特
移書屬之我公倘獲賜之末席或及從公珥筆濡
毫圖寫所爲瓊花觀以歸茲固八十老人之所指
掌憑欄而欲爲公歌且賦之以貽後世者也幸開
襟而留意焉

與李見羅書

僕無似獨辱先公左遷敝郡時輒引帷中爲國士
已而又辱令先大父茫湖公賜之以忘年之交久
之昆仲相繼第進士往往以道義文章相追琢盖
附交籍者三世矣頃者公以名世之賢按兵絕徼

所嚮爲功焜耀當世豈謂甘陳老漢之萬里長城也而竟爲讒者所冤僕每讀劉向訟功疏數爲之歔歔太息也 國家方東憂倭北備虜所需封疆之臣甚亟而世有干將之劒顧獨羈之豐城之獄謂之何哉雖然海內士大夫無不人人爲公扼腕外之緬甸夷徼近且走萬姓伏闕庭抱痛流涕公之功與罪抑足以暴於天下後世而異日史官當必有如書甘陳之功者公亦何所恨哉公今遠戍海上許敬菴中丞適持節七閩所當波濤魚龍之患方蒿目攘袂公今過之茲又眼前一快心處也

如何如何不盡

與邢知吾少叅書

僕罷官四十餘年於海內賢士大夫絕音問曠宴
言然而公之風流藻雅間於亡兒積及顧甥侍御
輩稍稍獲睹什之二三已而縉兒令章丘語次公
之所握手出肺肝綰帶結心腎再讀公所撰去思
碑其所次吏民之擁戴與田野所尸祝及當事者
所按其科條而徧行三齊州邑處一一如掌當不
減太史公及班掾之傳循吏甚矣知已之賜所當
與日月俱遠者也忽辱遣使函手書併及機杼之

遺何敢當縉兒茲歸也蓋當西臺時偶聞僕之患
背癱也輒爾乞疾來歸四三年間僕且稍稍康食
所共父子閉關以詩書典籍相朝夕已而前年以
吏部注下考不復出矣而一二先輩姻友間以僕
之年雖邁神猶不衰而兒竟以此留滯不無可惜
故特強之謁選公且再出柄政不知可借公之使
星所嚮或及瞻睹以慰生平否不盡欲言

與醒神書

癸巳冬十月顧甥侍御從雲間回爲言獲逢翁眉
睫問其貌則脩然鶴髮而顏且脂以酖也問其齒

則疑百歲以上而不能記其年也問其姓氏與家
世則云翁特哂而不以語也已而探囊中所請翁
題其所築園曰蔗園其樓曰夕佳且其字畫翩翩
乎古者山澤蕭逸之韻也已而又扣翁所爲攝生
者曰其所爲飲酒食肉冬裘夏葛與世人同而中
所吐納導引之術超然出於形骸之外而有非世
所得而窺之者嗟乎翁豈抱古者洪厓浮丘安期
偓佺之深而有所自好者與僕聞之神若解而魂
且越倘及從翁杖屨願附古之棄妻子若脫屣者
固不惜也嗟乎忘生者而後得長生僕非敢遽望

翁攜之似吸沆瀣餐煙霞而逍遙乎蓬萊方丈之
間也第獲翁不鄙遺倘獲口畫之以泉飲谷棲一
二肯綮或及稍稍辟穀茹芝而從清心鍊氣不知
老之將至云耳謹顙使函書以聞惟翁憐而許之
與許敬菴書

故友沈青門之孫曰庇臨過金陵求謁公竊思青
門故以詩畫負米芾暨徐熙者之望爲重湖海間
而其寫花也不以貌而以神往往能使遊蜂飛蝶
若鼓翅而過焉以此名當時而數及橐裝至千金
然不善治生僅以丹青世其子若孫今其孫庇臨

似能世其業而以之衣且食於湖海者也頃珥筆
入金陵而以金陵諸公卿間惟公爲今之白香山
少傅也屬予爲之紹介竊思樞副之門非六郡材
官卽虎賁劒客公今門下則又半屬談經論道綴
文之士恐於此輩日不暇給或曰公固古所稱吐
哺輟洗以待天下之士而於九九不以遺者沈生
所挾匪特九九已也况舊京多五陵豪俠三吳繁
華公子公倘垂憐稍稍賜之以緩頰而吹噓焉沈
生當不啻明珠大貝之爲寶於世而青門其亦不
亡也已茲亦公之下士之一籌也萬惟垂憐焉

與姪舉人桂書

姪行年且五十於舉子業可謂苦心矣舉業而入
苦心之路其於名理雖或精研而於風調不免沉
滯嘗聞先輩舉業三字符曰典淺顯予獨更之曰
輕清精然精之一字亦不易得但能輕清而稍加
之以秀逸疎爽則百試百中矣嘗謂頭場七篇最
爲喫緊須如行雲之出岫巧燕之穿簾荷葉之擎
露桺絮之飄風萬無過思深構過思深構必致重
滯艱澁於二三場以後並聽姪之蹀躞馳驟出經
入史千金之駿絕塵而奔亦無不可者先輩舉業

之最如王守溪之渾雄臺閣唐荆川之精純典雅
汪青湖之豪爽薛方山之奮躍並所不易得者獨
聞韓昌黎有云如駕輕車而就熟路以此携之爲
舉業訣可謂最便法門近日兒維寄北京鄉試七
篇姪嘗誇之當爲舉業中赤幟予獨疑其太橫喜
之者什之五而驚且辟易從而厭之者亦什之五
而縉兒亦讀之而曰但恐落老學官之手當爲覆
瓿矣今已垂翅傳聞果被以高年校文者僅於首
篇加數點後並不及覽何則彼且視之爲怪僻不
復覽睹矣吾姪之才奇崛魁梧獨恐其一入沉滯

便令校文者澁眼縮首千萬放令輕清而加之以
秀逸疎爽斯則姪之老馬長塗而姑從康莊以策
轡而馳亦所以慰我衰颯懸懸之望也

諭縉兒書

頃覽汝所爲轉假疏不覺怏怏怒抵之地夫余豈
世俗尋常之見哉不暇遠引姑卽汝入仕以來本
末及余生平耿耿未了之志爲汝詳之汝之初舉
進士也卽乞差省我不足論已而由章丘入爲御
史此正奮報國家之時奈何甫及數月以吾偶
患瘍疾遽乞休沐此其誤者一壬辰桂吏議汝卽

悻悻有終焉之志余聞章丘士民輕千里而號訴
國門者殆三百餘人也公論猶在人心猶不灰故
強汝出已而補浙川令聞汝不以遷逐自居頗拮
据撫字遂及量移南部郎 國家於汝亦不薄矣
正宜竭力奮報以收桑榆胡爲乎不及赴官遽以
疾乞歸此其誤者再汝不過以我年踰八十日暮
可待豈知世間固有百歲人卽如吾近所嚴事醒
神翁或曰年百餘歲矣假令其子若孫能待其盡
而後入官邪汝蒙 中朝予告來歸條已三載而
今復爲轉假之舉不知汝之意何居將再偷閒三

年而後出乎抑謂吾之壽筭必盡於三年之內乎抑亦終其身不出乎如更歷三年則吾愈衰汝愈不可出如謂吾筭必限於三年則恐汝有所不忍日月云流汝老且至他日欲出則不忍欲轉假則令甲所不聽惟有終身田里作一鄉黨自好之士耳汝父令汝讀聖賢書望汝科第如斯而已邪此爲孝乎不孝乎吾少時以名業自喜庶幾爲國家效尺寸不意三忤執政遂致淪落生平未了之志付之汝輩汝受朝廷爵祿不思致身而今日請告明日乞身此爲忠乎不忠乎語曰小孝者大

孝之賊孝經一書諄諄立身揚名古人祿思逮親
往往爲親屈烏有棄官不出方爲孝乎自漢世有
孝廉之舉而干名釣譽之徒故爲割股廬墓及一
切非常可喜之事皆非其至也卽如李令伯陳情
表千古艷談之然令伯比年四十有四而祖母劉
年九十有六汝年政與令伯等而吾年去劉尚十
歲汝卽慕令伯何不待之十年之後乎又令伯稱
內無應門五尺之童外無基功強近之親今吾有
三子三女十一孫三曾孫吾之起居甘旨顧獨賴
於汝邪吾雖老食不必視噎行不必杖扶汝視吾

精神色澤較之五年十年前何如而必欲以歲月
期我限我邪請汝思之假令汝有子已通籍將令
其朝夕相守日爲待盡之計之爲快乎抑令其馳
驅王路經營四方之爲當乎語曰不順乎親不可
以爲子吾之所快在彼不在此而汝不能順是泥
孝之小忘孝之大修孝之名而辭孝之實竊爲汝
不取也又吾官至藩臬以遷轉稍速不及膺國
家贈錫恩汝儻努力雖不敢過望得一外官三品
便可贈及汝大父母庶幾了我生平第一未了之
志吾沒且不朽而況於他乎吾心耿耿吾言種種

恐重違汝志尚恨發之遲汝果欲爲孝子當仰體
我心勿更猶豫汝倘仍補南曹則吾之履杖尚可
從汝於牛首燕磯間也何如何如努力努力他所
欲言姑遲之

茅鹿門先生文集卷之九

茅鹿門先生文集卷之十

歸安茅坤順甫著

序

送沈令序

古者之仕不出乎其父母之國間有不合而去而
游仕乎他國者大畧亦魯衛韓魏中山鄰服之間
交相聘而至者也亦不越數百里而止故其同朝
而處結珮而宦者非其父兄姻好則其鄉先生所
嘗與遊者也雖歲時州間伏臘宴會弔賑慶恤之
俗數相往來如里之田父服賈然故仕者至以官

爲氏甚樂且適也無所謂客土者之思秦漢以來
一天下而郡縣之或輦轂畿甸之士出於嶺海蠻
戌鳥言殊服之域或嶺海邊徼之士之入乎中州
率錯相易而至遠者萬里近者數千里其五方之
山川異壤衣食異宜寒燠異候燥濕異劑非惟歲
時州里之俗不得通而併其父子骨肉之音或阻
絕踰時而不至焉於是仕者始亟於轉擢以去而
所至往往多羈旅蕭瑟酸惻慨慷綿邈之思或感
歲時風土與其鳴春之禽四時之花木山河之攬
帶池臺之燕賞彷彿差池乎鄉之所習觀者數共

騷人墨客賦而歌之未嘗不歔歔若草之吟蟲懷
然以悲也間有鄉之人與之同遊於其土則不問
識不識欣然若相悅也何者孤鳥游異林聞同音
者則蛩然喜和鳴不已情也此古今來人士所同
而於時之遷臣逐客被罪而至者爲甚予吳人也
吳之土戶牖之間山川相軫結水爲廬而杭稻鴈
鷺魚鱉芰芡以爲食者也去燕趙數千里所謂五
方之山川服食寒暑燥濕不同習者而予待罪茲
土適吾鄉沈君大衡爲未年令且彼所稱不識者
猶欣然相悅也而况君之賢尤鄉人所雅慕而譽

之者乎君數由公事首羣吏來謁郡署予輒撤去
臺叅故事與君退食共爲吳人而語商確土之民
所疾否間於歲時欸欸指次鄉土故事又怡然若
遊茗雪橋李之間聽採蓮之唱吳趨之曲而忘其
去者也亦洽矣古之遷臣逐客之懷予將於君乎
憑而寄之而君且倏以考最去君爲政不務聲名
惟廉白自持恂恂近古之遺愛焉予知茲行也例
留擢京署不然當必改他州郡以去不復來嗟乎
君之去也與予坐爲吳人而語於其左右者其不
可復也已吾烏得而不飲鬱於其心乎故於其別

也申之文以緩其行

顧遠齋復河南僉事別序

公徙大名同知三月復河南僉事以去公於予衆所稱鄉先生者也屬邑長吏九人盛供張祖道衛水上請予文紀其事予遂屬草三易稿累數百千言不能盡取而扣之其旨嗚嗚然寥慄恍怳然若不能成聲者也則又燬去有從事者觴而前曰公之鄉誼子大夫所漑於心者舊矣其來大名雖未幾吾屬醉之者若南風之絃也子大夫亦適徙廣平至於此所謂東西州然言甚易者何朝命童子

操縑與墨侍左右暮不能報也豈兩君者均以罪徙至此又離且去故悲者不可以累歎呻者不可以太息耶予笑曰曾是之謂哉嘗讀傳記詳古賢人志士出處之際自屈原賈誼以下何可勝道也其間或復或不復或旣復而放或再放踰時而復不暇論故士之於此譬若江海之漚顯晦離合唯其所之焉耳予於公亦何適乎哉獨吾今從諸君導送公茲水之上延眺數千百年間遷臣逐客之轍徙而渡者不知其幾入國家來以郡饒而僻繇罪徙而至者軫相接也然其間著功德於土與

其暫至而去無所謂功德者於土而特採其名以傳書之簡冊祠之伏臘所遺燕遊歌賞之址山氓野父指而語赫赫若昨者獨文潞公彥博韓魏公琦歐陽文忠公脩蘇侍郎轍以及韓絳劉摯陳執中之屬五七公者歷歷可數也餘皆尋已零落烟波霧澤之間而不可求矣由此言之古賢人志士所以徙而暫寄者跡也其離而旣去而獨有所常留者道德與勲名也其所謂顯晦離合可喜可悲者吾不知惡乎在也吾屬相與指顧河山草莽而一以盼焉能無悲歌感慨彷彿古所謂爽然自失

者乎哉予知公非區區於世之顯晦離合者故於公之去有所口噤而不能言蓋在乎此而不在乎彼也公領而大笑欣然噱飲以爲別

贈牛昆溪同知廣平序

予觀孔氏之門所稱異能之士甚衆然顏子而下其日侍於左右之側而欣然樂者唯閔子冉有子貢季路數君子門人所相與摹畫其衣冠言貌之似特閔子曰閭閻而已其餘若冉有子貢以侃侃書季路以行行書均之書其所爲剛與直者予嘗誦其言過闕里望孔氏廟宮像想見其人大畧以

魁梧嶄岸之氣自喜令與今人遊今人類不好者也他日論友則曰友直益矣又曰吾未見剛者斯民也三代之所以直道而行也孔氏獨纍纍然數稱而嚮往之何哉語不云乎剛類火直類木其材燥而上行而不膠折於物故物不能侵闖之蓋不如是不足與近乎道也予同年進士河南牛君者長七尺廣頷豐顙美鬚髯褰衣博帶意豁如也間與之扣古今事論利害成敗得失數稱先君子之旨癯然當可否鏗然若敲金戛石而出無留也雖面批人有不顧者當是時人望而貌之無問識不

識相與指而呼曰牛君剛直人也殆孔氏之門所謂侃侃行行者之似也由予觀之史稱魏俗剛武上氣力子貢季路皆魏人君之所稱鄉先生也君豈其流風苗裔耶何嚮見孔氏廟宮像及按門人所以摹畫其衣冠言貌之似吾今於君特疑不能辯也似不似吾不論而世之人類能好君否也雖然孔氏之所與者非與其侃侃行行也與其侃侃行行者之可以近聖人之道而不爲止也行行者剛直之最露者也侃侃則稍堅忍矣然要之負氣而非道勝者必閭閻若閔子庶書之所謂直而溫

剛而無虐於道近之矣孔子他日又論好直不好學其蔽也絞好剛不好學其蔽也狂皆所以摧季路魁梧蘄岸之氣而納之於道如閔子者也予南州之人其氣多弱於君不相及然獨數以直自喜而深好君聞君來同知廣平吾躍然又數自懼不能不於君乎規者故於諸從事之請詳書所以而告君焉君能莫逆於予之直乎否也

贈陳孔目序

繇周衰而仕諸侯之國者非公族之子則四方之士所客遊而至者也古昔先王盛時養士之法學

士大夫共視以爲迂遠擯而罷去之今其遺且載
禮經其德行道藝之所書會民讀法鄉射養老獻
賦訊囚箴舞絃歌軍旅俎豆所與攷習大畧隋唐
以來博士弟子之所不講者也今一旦舉其說而
聞之於衆市之童子必呶呶然羣而嬉姍也吾信
古之道不得驟行於今之世者然獨竊取先王之
意所謂庶幾其近似者彊之莫若尊師何者古太
學之禮詔於天子無北面所以尊師也州黨之間
抑有所謂鄉老者贊鄉大夫而書其賢者能者以
獻于王內寄其權又外優以不臣之禮而尊顯之

蓋所以嚴民敬事之心而興其道也迄漢興天子
猶數詔茂材受學國家有大疑難下太常會公卿
百官各具師之說以對諸生詣博士登堂頌禮必
嚴或誦說有法必驚問曰何師則謹對曰師事某
其所以嚴而事之者如此故其時之賢材雖不能
盡如古昔盛時之鉅而明經潔行孝廉樸茂之士
繇高第入爲列卿二千石而有顯聞於時者史不
絕書也予觀國家來中外州縣之師率錄州縣
所爲齒年以貢之弟子而領置之間由舉于其鄉
與進士於天子之庭而至者特百之一千之

一而已是以長州縣者與刺史者之至幸以升斗
簿書之吏厭視而不厚爲尊寵或以稱書于上又
輒坐故事待之踰時受州縣之吏而止信如是則
衆何所勸何以廣厲學官而興教化也當是時學
士大夫數見世多所稱豪特奇崛之材顯名其間
而曰事如是適矣似不必區區慕古之道者抑不
知非由今之法養之如古盛時者然特世所負豪
特奇崛之才不終絕于時於是乎稍稍出也予願
國家罷去州縣師之法畧倣古鄉老遺意擇其經
術傑然者賓禮之稍以稱書引擢州縣之吏以上

而異等者大較當攷宋諸臣表胡瑗故事然後四海之內令習睹古所謂尊師者之概慕誼無勑也予友王君汝修志古之道聞予言而好之因爲予言濬縣師陳君者陝以西博物君子時時舉古之道爲弟子誦說予奇而藏之胸中久矣頃屬草郡志來從事予驗之果王君之言不妄而未幾以遷翰林孔目去按君職卽古文學掌故之屬非世之茂才不得與豈國家上採故事而將褒禮之顯榮君之道耶古所謂尊其師而嚴事之者耶抑亦繇君之賢偶卓絕於時不但世所謂千一百一而

罕遇之也君行矣入待詔承明之廬朝夕與世之名公鉅人者遊試以予言質之合乎道否也

叙丹徒縣洲田誌後

郡太守巽峯先生洲田之法行其川隰江海沃埜之利旣入于官而勢家鉅室無所厚射以滋訟鬪卿大夫之過道里者郡縣歲計其入以待委積故時共張宴飲車馬饋遺一切無會之徵所繇腴民脂理以赴交締之壑者悉已罷去司諫荆川先生記行事書而藏之名山矣先生復請鄉大夫自山吳公爲誌以事必詳始則其情見故爲公移以田

之塗澮不分則民有血氣不能無爭心故爲圖以
財之出入無式羸縮無式則司費者或起而攘非
所以勾郡縣之籍以遲其久也故爲例以法必公
議則來者可守而采風者有劑也故爲記議賦頌
書凡若干卷刻旣成其隸邑吏茅坤廼讀而題其
後以告繼今日之有司者曰是法行其貲入于公
府其出入悉總于司財者書之以待歲弊郡縣非
爲公費不得書爲公費而郡縣之事不得書郡縣
之事而上官或命書之以待歲弊也則得書其或
上官欲有所費命於有司而不欲有司書之也亦

不得書不得書則不得以其財入出故嘗按書者之所籍以攷故時里甲之費郡縣佐貳察幕所自爲奉御者什去其九過卿大夫所籍以爲款澤絡繹道路之間者什而去其六七及其上官官司所轄歲至之常以爲奔走供億者什而去其四五他日郡縣之長吏於此使其約已治官守之百世可也稍令內不厭其子女童婢之欲以事奉御外奪於連騎結駟者之紓求以納款澤中復唯上官者之所延頤滄澠河沁以爲奔走供億則以是法爲贅疣所甚不適意於有司呶呶焉訛言搖亂而去

之唯恐其不蚤且力譬若薪之待燎行之數年不可得也而况望於久乎易曰窮則變變則通遲之數十年之後而洲田之存者或沒沒者或復時之沿革財之消息與司財者之庸與否相攝而行之以不失乎今日之意是則巽峯先生之所望於有司也予故表而出之以待後之同志者又題而告郡之勢家鉅室者曰是法行則齊氓蒙故業凡以氣力雄食郡縣者既不復能射江海之利以競擊鍾鼎食之富當其苦之然而齊人歿鹽策粵人歿機翠利之所下民共惑而犯焉故也故聖王禁利

以定四海諸侯禁利以保境內况郡縣大夫之獵其所入以待所出凡以爲民也因公家之帑以寬什一之誅非爾鄉黨鄰里朋友姻戚乎語曰君子富好行其德小人富以適其力盖言唯人也予故表而出之以待郡之行富而附仁義者

按洲田法所爲節里

甲者甚善惜乎縣之歲費僅百金所以行之不能以久也并跋

送呂芹谷出守襄陽序

古之人有功德被於其土史氏書之竹帛及其沒世之後近者百數十年遠者千餘年其在當時所施爲之畧盖已剝蝕烟波陵谷之間而無能指次

之者而土之人猶相與像而祠之或卽其蕪宮廢
第所嘗賦歌宴遊之處聞其名氏輒悽然歎歎悲
慨伏而弔之若此者豈近世所習視區區簿書筦
鑰之謹與夫廉俠幹局之勁能樹功名于茲土與
彼其德有藹然入乎匹夫匹婦之深而莫之爲而
爲者此之謂古之遺愛也而予竊恠今天下州郡
才吏往往其所以功名自喜震耀當世者或不於
此而於彼何也襄陽者阻江漢之上所稱中州之
最雄者也漢以來世所當侯王戰爭數持重兵臨
鎮於此其在承平累洽之後則又以其文儒領二

千石印綬出而守之者不知其幾其所能傑然表見者抑又不知其幾獨羊叔子以其風流文物爛然被江漢之間杜元凱以下歐陽子猶與其功而不與其仁且不得而並焉而當時襄人所爲書其祠之碑與過而涕者至于今騷人繪匠猶能摹畫而歌詠之迥然人之耳目焉豈非其德之人人深有所不可解於其心與予同年友呂子芹谷今且出守茲土試卽其境采民風而問之其所由然者抑獨何與嗟乎夫世所務功名者在彼而予所爲呂子亟稱而喜道之者廼在乎此母亦近於迂者

也然呂子怛然有志於古之道者苟歲時伏臘過
羊叔子祠下當必有深量予言而踴躍者矣

陳情錄序

陳情錄錄右都御史南渠王公尹應天時所乞省
太夫人疏及歷南京刑部侍郎時而以太夫人養
再疏來歸者也當是時

聖天子憫而許之縉

紳百執事共相矜以爲榮而各以詩歌倡和之者
若干首其系錄之額曰陳情云者則公之門生故
吏按公本末與漢李密故事合相與慕誼而書之
也刻成予受讀因竊嘆曰人少則慕父母仕則慕

君其所由積習者遠矣予故攷古今傳記竊恠世
所稱山澤一行之士能傲然自放江湖之上者有
矣夫旣籍朝請而能以父母之養爲患翛然若蛻
而引者甚難也若漢諸孝廉起家白衣始天子召
之蒲車亦時時聞有引大誼辭使者位稍通顯第
歷公卿以后史傳所載蓋寥寥矣若此者豈古今
位涉公卿者類多資待旣久春秋高不及其父母
之存者與抑亦繇其身旣貴近天子數寵臨之而
勢有所不能請與何嚮或能之而此卒不能也抑
亦以山林寥曠其始麋鹿貌兕之在野者固相狎

也而入苑囿飽豐草彼遂有所縻而不能置與予
間按公再疏日月公年始逾艾於禮猶服政家尚
有兄仲亦不應制所稱子一人而父母年老者得
歸養公廼獨能抗疏引傳記所少見之事與古禮
及今之制所不應者恬然以其身際日月之貴而
遠徙林壑視山澤一行之士無以異何其壯也及
太夫人沒有司疏請復出公時稍遷竟不能久留
而上 天子印綬乞骸骨去亦可謂賢矣嗟乎
大臣者國家之表也當其父母之養苟能如彼白
衣者恬然世利之外而乞身以退奮決而不顧其

流風蘊義豈特區區間里所稱孝謹篤行已哉天子而有乞身之公卿於下則必禮異之其心固曰大臣之孝廉也如此其不可以祿而羈繫之也如此而不忍辱之矣百執事而有乞身之公卿於上則亦矜而傲之其心固曰天子之嘉大臣之孝廉也如此其不忍以祿而羈繫之也如此而亦不欲以自辱其身矣如此則大臣重小臣潔朝廷尊而天下治矣否則大臣固可辱而使而有如頃歲以來簿責諸公卿狀其所係國家得失豈細故哉嗚呼於是時或有識者按公故事讀其疏想見其人

能不爲之泫然歔歔流涕矣乎予是以敬爲公志
之非特曩史官所書李密輩一行而已也公名燾
黃巖人學者共尊之曰南渠先生其居諫垣時所
數上書諫止 武皇帝遊倖及彈劾中貴多近
世所難言者及尹應天吏民於其去相與像而祠
之予嘗過其祠宮下刺問吏民吏民沾沾口次有
兩漢京兆之遺指云

送陳僉事序

大理寺左寺正陳君擢廣東按察司僉事領高肇
以西右寺正顏君而下謀屬贈言於予佐其行嗟

乎予能助陳君乎哉高肇僻處百粵南徼去京師
萬里按圖經及傳記所稱其土椎髻而跣先王之
所不能正朔也漢以來稍稍郡縣之上下數十百
年小吏之編輸而治租賦者亦數矣聞其夷獠之
習相錯囂然猶舊之十五未已也豈五方之人不
相適譬之寒燠燥濕區區鳥言之裔固不可勤之
以中州與抑亦中州之才吏或不及至遊於其土
間至者特簿書繩愆無以先王之道導之者與竊
惟予吳越於春秋時齊魯宋衛曹鄆中山之君嘗
夷之不以與盟當不能半今之高肇之區也子游

以布衣掘起其間而北學於中國翩然遽能引孔氏詩書之旨修飾其俗吳越之教於今首功也況乎陳君者世之才吏持

明天子璽書而監視

數十州縣之民與有司朝席而暮視之使能以子游之學而南而端委以臨焉其何有於吳與越乎過南海甘泉先生在焉或所謂南方之學得其精華者斯人也君能過而學之當必爲助於君矣

壽東吾譚先生序

始東吾先生之教湖也坤在諸弟子中而先生之中子綸方童齠時聞亦攜之來與俱予兩人者均

先生之所器而命之友者也後十年綸爲南祠部而予亦調爲兵部郎因次坐祠部君問之曰先生之去吾湖也何以曰擢順昌王傳頗數採古者王吉龔遂諫諍之誼以明職然非其好也遂棄去歸老矣問何以事老曰先生性澹泊自喜世所馳酣戰鬪不入於其心君之所知也日惟閉戶諷老氏書以自娛課吾兄與吾弟注文幾課兩童僕種樹種韭幾暇則召里中能者令家供具與飲酒無筭投壺雅歌仰天自樂他固不知也車不過城市歲時鄉飲讀法有司間以召或至或不至也問疆

有力否曰年且七十矣猶日飽飯數盂魚一盂蔬
果二盂鬢髮與髯曩之漆者黝者今化而爲蒼矣
然尚未白也澤顏而脂頤語古今圖史得失刺刺
不置口猶君之曩所與遊也問尚能從山水之遊
乎曰不厭也居頃之祠部君函封縑一軸過予所
請曰某月某日先生之辰今年且及期矣制有兄
弟而父與母老者不得侍吾之兄與吾之弟數奉
觴上壽吾獨不得俯仰其間何以自適乎詩曰豈
不懷歸是用作歌惟君爲賦而識之也予題之曰
聞古有鄉先生服官上廉白歸則杖於其鄉以孝

序

卷之十

六

弟力田教子孫命之曰三老國家有大故數賜帛
存問若吾先生者斯其人與斯其人與金陵多佳
山水及古隱淪道術之跡先生脫不厭願載之東
遊吾與祠部君且告休沐出而日侍几杖如湖中
時焉可也

贈栗僉憲序

聖王之治天下譬如醫者之治疾也苟可以活人
則雖溪壑之毛蠻海之蜾產于窮山絕徼鳥言卉
服之域猶採而煮之而况鍾乳烏喙出於中土與
閭里之間者乎未聞以誤醫者嘗殺人而槩阻遺

之也予覽觀

太祖採三代之誼錯封同姓之

國自臨緇遼代以西涉太行雲中南出汝漢長沙
豫章以捷蜀徼叔伯昆弟冠帶之國半天下又監
漢諸侯王爲世世子孫惠故名川大陂租賦之壤
不以封不得與政事列朝請或頗疑舜爲天子封
象有庠使吏治其國者爲象不仁也殷之微子比
干周之虢叔周公旦與夫毛衛之事去上古近姑
不論卽漢劉德歆向父子唐李德裕宋趙鼎汝愚
之徒其出入將相書之史冊者歷歷可睹予故間
讀魏陳思王所爲求自試表每於今累欷而泣也

然按國家以來深懲博謀世世無恙中葉以後則又稍稍諸王輔導官屬亦不許轉徙如嬪以下暨縣主之子系支庶並不得通籍朝署竊謂同姓骨肉至親之臣也假令諸輔導官屬與戚畹之子系支庶有如漢周昌賈誼董仲舒鄒陽枚叔王吉張敞及馮野王父子兄弟之徒出乎其間而苟以法棄之何異產之中土閭里者活人之材卒因誤醫者嘗殺人而槩阻遺之也乎且自古以來記籍所載同姓之國爲患者唯漢爲甚漢之患在諸侯疆大擅山煮海得自置官屬治租賦爲孽非由

輔導官屬得轉徙與戚畹子系支庶入奉朝請然
也又孰知邇來 諸王國間以驕不奉法有司不
能制或由諸官屬與戚畹之家左右無狀使變今
之制中外一體令如誼吉鄒枚之屬爲叅乘輿出
入兔苑其間安知不如曩時涕泣而譚且歿於其
職者予故數發憤思欲効萬一之議於 主上
特未會便今予觀上黨栗公慷慨多大畧有古豪
儁者風每自許使遭際漢武皇帝當舉茂材異等
可爲將相使絕國者予壯而察之似亦無異斯非
世之所慕鍾乳烏喙之材乎顧由母夫人爲桂平

縣主舉進士第坐國家故事出守陳州已而累二十年今始疏爲陝西僉事人士或幸公遲而及用而予獨憐公之材異等恐猶不及盡用於時也雖然西北頻年多虜寇吾鄉總督曾公方草河套之議公脫能展素所蓄抱爲拓土河朔聖天子方拔士如轉圜集議若流水安知世無訟功者出而建議於時務增損故事於以盡公之才者乎其有與無不可必唯公慎自勗以俟吾知鍾乳烏喙之必不遺於世也

周氏族譜序

代韓苑洛公作

予門人楊君汝修嘗與給事中周君順之逮繫獄中已而蒙天子仁聖釋放汝修出與予言給事君之爲人與其待罪狀予盖耿耿也久之給事君手編所爲族氏譜因以書貽予曰古者天子胙諸侯公卿大夫士之土則各命之氏諸侯公卿大夫士之家各按其氏系以宗法行世祿之典其比閭州黨之民不及以世祿者亦繇口授之業長子孫於其土而太宰往往以九兩之法拊循其衆焉是以族聯而不散教隆於上而俗美於下有以也中世以來諸侯公卿大夫士之世不及祿崩離分

散枝蔓乎中國又革命之際所當兵燹戰陣與夫
荐饑相仍亡徙道路山谷者不可勝數是以州郡
之間求其唐宋以來之族且不可得而況於古者
氏系所出乎甚或再傳邈不可攷伯叔昆弟之間
若秦粵然相奴隸牛馬者有之此學士大夫之所
以歔歔飲泣而譜之所由作也怡不佞周氏居太
平某里者八世而上不可攷按福四於予爲祖系
所可攷者之始由福四再傳而爲端慶者予高祖
高祖之下始得予曾祖行者二人絕不傳者一人
祖行者五人絕不傳者一人父行者十六人絕不

傳者二人予兄弟行者四十六人其絕與否及子姪行者咸未能書也嗟乎予四十六人及今猶能字而呼之數傳而或窘於兵燹饑殍之餘安能不復如曩之八世而上其伯叔昆弟之間又焉能不爲世之秦粵而奴隸之者乎又況望其或出於此有所謂古之族訓者乎予竊懼焉幸

明天子

放歸田里廼得放歐陽氏譜法手次如左而族約數條則采古者族食之遺以待後之人者也惟先生賜之一言予敬讀而題之曰古之著姓公族必獲賢者而昌周始建姓以其氏名焜耀傳記之間

者甚衆然給事君嗟遠不可攷不欲附離之其所
自傷者遠矣廼今給事君進以其身抗疏於
天子之庭濱死而不顧退則修明其道以首帥鄉
之人非古公族所稱篤行君子者乎使後之子孫
讀其譜共守其約謹識之曰某以下先生之裔也
某某先生之始祖以下而高祖行曾祖行父行
而支屬者也先生首賢者之誼以大其族而其所
以食之而訓之者又如此周氏之流風蘊誼於今
寢昌矣茲或給事君之意哉己酉秋九月望日某

序

贈王兩洲大宗伯給由序

公卿有遠行則從官以下百執事有司相屬治供張于郊擇其善詩歌文辭者賦而祖之舊也近代以來大畧並好侈陳其才畫與其所臨官赫赫人耳目之勲位與聲望他或不逮焉予按之似非詩書之指也昔周成王推擇百官臨鎮東都曰君陳孝友于兄弟克施有政尹吉甫北伐獫狁來歸天子賜之燕喜而詩人乃歌之曰張仲孝友夫以古者頌美大臣不本其才畫勲望而獨孳孳其室家父子兄弟之際者何哉蓋孝友者君子所稱神明

之德以之修其道於家則和而祥以之聲施於朝則顯而洽三代而上大臣所以措諸天下國家以戴翊天子蓋繇是也兩漢時丞相御史大夫而下稍稍以孝廉進誼卽此今南京禮部尚書安福王公自

武皇帝時起家凡數十徙官以迄于茲中外士無間智與愚苟按其爵里名氏咸能呼之曰今之聞臣也坤忝廁從官後間伏謁公特貌疑其道非今人然者廼退而質諸公之弟司務君司務君爲予詳公之爲人子依於孝爲人兄依於弟而所居族屬支庶自米鹽毛瑣以下不可手畫也

嗟乎盛矣若我公者豈非修其道於家者豫故出而擅聲施於時者章章若彼於公以給由行從官而下咸持故事倡和詩歌若干首祖道右都門上坤非能文辭者也司務君前屬之坤坤皇恐慙怖謝不敢當竊謂公之道信古詩書所次大臣之指不可以無述也又於公之弟爲之辭故不以衆所覩記公之才畫勲望而獨詳公之所以室家之細且令天下學士大夫聞而謀曰古所稱大臣若君陳張仲者流其道在乎此而不在乎彼庶知所本而慨慕於心也謹序

茅鹿門先生文集卷之十

茅鹿門先生文集卷之十一

歸安茅坤順甫著

序

贈朱射陂考最序

古之爲詩自王公大人以至田夫野婦家習而戶
眇之是以兔罝鷄鳴之吟雖甚微細而其音節之
至可以徵管絃動天地感鬼神當是時太學之教
與天子所以論士而用之之法咸本乎詩故曰工
以納言時而颺之格則承之庸之又曰誦詩三百
授之以政有以也漢以來詩之道亡矣其能以音

節擅于時者非其匿山澤務丘壑高蹈冥跡之士
必其遷臣羈旅頗以賢豪宕軼之氣自喜困於燕
雀感懷抑鬱不得志也然後大嘲小賦嘯傲日月
太息今古也其言窮而以工求其如嚮盛時所謂
王公大人言之幾乎道者特不易得焉間有學士
大夫天授之音節而雅善爲詩歌者出而綰印綬
爲吏以彼其材往往以賢豪宕軼自喜之氣淋漓
迫隘乎其中所至或爬幽發伏鋤疆剪右間多有
環瑰蘄截可愕可慕之政而同進者忌之勢家鉅
人嘗有怨者又從而旁睨巧伺以訕詈媒孽之故

動而得譽謗亦隨焉自古縉紳先生以此覘詩之
數不見用於世而曰詩能窮人或曰詩必窮而後
工要皆非言之至者也書不云乎詩言志志也者
心之所之也感於物而動形於聲發乎情止乎禮
義故其音溫柔敦厚而其爲政也達古者太學之
教與天子所以論士而授之以政蓋在乎此也予
友射陂朱君天授之音節而雅善爲詩歌者其出
令烏程獨能自摧近代學士大夫自喜之氣而仿
彿古詩人者之至大較政務近民初不事世之環
瑰嶄截者之譽君爲人特澹泊自持同進者不忌

又予烏程鄰邑人烏程人亦恬服君之行政亦絕
不見世所稱訕詈而媒孽之者此其善下人而人
歸之吾固知詩之不能窮朱君也今且以考最行
天子方招選詞賦侍從之職君旣以詩歌名于時
其入也不爲翰林必爲諫官當必有古者雅頌之
遺以獻明天子者也

壽烏程尹錢君序

世之養生家之言曰精神之於形骸猶國之有君
也神躁於中而形耗於外其勢鮮能以得長生故
上古以來間氣獨稟之士始符合道之自然其次

莫若修形鍊性以固神然後可習爲神仙神仙者
六經孔孟之所不道予固未之信獨喜其言澹泊
自適近於道者也頗厭俗不稱意稍稍從深山盤
谷之間陰求其人與之遊而山谷間間出烟霧之
癯漆面而蝨首兩瞳子隱然若水碧之峙也頽然
偃卧於其宮扣之不以語也雖未必盡合養生者
之旨要之其中忘歲月習服食似乎有得者予是
以益奇傳記所稱山谷之人多壽非無取也蓋山
谷之人於世旣遠世所沉酣戰鬪淋漓艷冶之慾
無所入於其心則形固而神全故多壽又惟吳郡

波磔之國也其地擅東南魚鹽橘柚稻蒲鳧雁之
利故統綺文繡泉流於天下而富人鉅族往往習
買田宅歌兒舞女園林鐘鼓以自適蓋其俗使然
書曰生則逸惟耽樂之從罔或克壽似也而海上
錢氏者尤郡所稱富人鉅族之最彼山谷之姿當
無所移易而至廼京兆君爲予言年且五十矣父
翁烏程君年七十大父翁年九十有奇前兩歲大
父尚無恙烏程君時時手白髯裁衣冠杖而羅諸
孫前伏奉觴上壽几席之間凡越五世也而今不
可復矣予茲歸冀且以曩所壽大父者壽烏程君

予聞之竊疑錢氏者豈其田園鐘鼓歌舞統綺之
麗特若世幻之適也而有所不緇於其心與或養
生家之言與書之所傳卒無驗與不然何其世世
享多壽也抑亦上世所稱間氣獨稟之士無擇於
其山谷者與或否與予皆不能知也予雅識烏程
君治烏程特疑其類有道者也故於京兆之歸壽
也貽書以問之君幸爲我告焉無若彼山谷者之
扣而不以語也

贈畫像者蔡少壑序

陽明先生沒而四海之門生故吏及嘗提兵所過

州縣蠻夷之廬爭像而事之當是時陽明先生之像遍天下而豫章間所傳特類甚予還金陵一日考功何君吉陽刺其所爲像者過予且曰卽豫章間所善像陽明先生而名者也予奇而飲之因強所爲陽明先生像酒半酣起據席索縑左手持觥右手汁墨嬉笑淋漓摹畫之點次若飛不爲經意然頃且就予間攜之出示所嘗共先生遊者或覆其半露其半卽能按識而呼曰此某先生也噫亦工矣予嘗慕先生與其門弟子誦說其道往往以不及從之遊覩其所爲冠裳容貌爲恨今迺得依

先生之像類甚者存而禮謁之幸矣哉像曲技也嚮苟非與遊之深而求之至習寢食共几席朝且夕焉縷心纔腎有獨得其神於冠裳容貌之所不及卽何以能圖寫冠裳容貌如是之工工矣陽明先生之沒不知其幾十年矣抑何以肆焉而手次之若是也夫像且爾况吾黨弟子之誦說其道者苟不薦志而好之如爲像者之求先生焉其能間竊其似乎哉而况望其又有出於冠裳容貌之外者哉嗟乎予感君之獨能而特耻君之不如焉此所以於君之歸而書以貽之因以自警也君姓蔡

名世新南康人別號少壑

贈張御史出守順德序

予嘗按古輿地圖及次傳記所載河北諸州縣沒於秦以來千八百年之間所當侯王戰爭兵革之跡不可勝數若鉅鹿者古戰場也及繇罪徙廣平時道出順德南界稍立馬杖策而弔之野老咸嘿嘿不能齒兵革之事所習者小吏治租賦歲時伏臘宴飲之社及閭里慶弔賑賻鬪鷄走馬蹴鞠遊冶之戲而已問故時侯王所伏尸流血處蓋已晏然禾黍桑泉人烟市廬之相壓於其境而能指言

之者或少矣豈非由

明興籍爲

天子輦

轂郡縣

列聖相承四郊之間不識兵壘故民

之生齒繁而俗移易至是乎書籍以來於今盛矣
雖然予間視諸州縣衆特不務積聚歲時有水旱
凶荒則易以轉徙故土著者無數傳之族也計口
間里之間非故時比矣然詩書未洽也急則習椎
剽持弓刃相嚮其獷悍之遺猶舊也母亦今之爲
二千石者出綰印綬而吏於其土其權太輕又數
亟坐叙遷以去故不能重且久於其職以務滋
天子之德化然與抑亦不得其人與予同年寒泉

序

卷之十一

六

鄭愛
三言六六

張公故嘗令洛陽以能稱而入爲侍御者也今出
守吾不知執政者遽能易今之制獨重且久公否
然苟得其人則其所施於郡者當必有古之良二
千石次第所陳見者也將不特予曩所過弔而識
之者而已予謹書之以俟他日采風者之質焉

送華補菴郎中還山序

中世以來士大夫之棄官而去能頽然恬勢利以
飽丘壑者蓋罕矣間有之必其遊且久數鬱鬱不
得志或憤然憎世絕俗而有所不能容於時不然
則他日故嘗有所忤於當世之顯人巨公而懼其

以睚眦中覆之也又不然則其位盈而年且踰矣
例當以自請而去者也若此者彼皆有所縻於中
特其遭困厭窘迫之故不得不以釋而去非所謂
頽然恬勢利以飽丘壑者也是以去之久稍稍或
從而悔恨之嗟乎名之縻乎世抑久矣苟非超然
有所脫於外以務悅乎其內其能以介然無故去
乎哉予友人南京刑部郎中毘陵華君舉進士九
年於此其以先大夫憂去官者數年及除官又移
以南則其籍朝請之列者特半也君又雅以好古
能詩歌知名於時聞中朝之士方上官期共推挽

序

卷之十一

七

謝

三百五十四

之君廼嶄然不欲待再上疏拂衣以去君非所謂
介然無故者乎哉然則君之恬勢利而飽丘壑者
舊矣予故知君之能以久而不復悔恨爲也或曰
古之史其以士之亟去位而功名不及著於時然
皆高其義也以一行書予非史也特書之以爲好
修者之傳且竊愧有所縻而不能去也因以自警
焉

廣西鄉試錄序

草就而不刻

嘉靖三十有一年巡按御史朱某監臨廣西試事
於是千里走書幣聘某暨學正某爲考試官教諭

某某爲同考試官時提調則右布政使劉其左叅
政張某監試則按察使魏某僉事茅某暨百執事
相與進提學僉事王某所簡之士一千二百有奇
三校之而得五十有五人錄其文之尤者以獻焉
制也且屬予叙諸首簡竊惟桂林百粵之地方二
千里其間佩印之城錯名山大川而列者以百數
亦古之都會也 明興百八十年來 天子
每策士於庭而粵以右所與錄名氏者不及五十
之一焉總粵右之所自爲錄按名氏而校其終且
與否者或亦不及什之一焉豈去 明天子遠

詩書未洽其勢不能與中州冠帶之國相甲乙與
予諗之二三子曰古之豪傑往往或出於四裔或
伏於海島而况粵雖最西南僻徼猶當今

天

子封以內者乎特在乎上之有司與下之爲士者
何如耳且今之吳越閩蜀古諸侯之所擯而不以
與中國征伐會盟者也烏言魑結之俗當與粵相
表裏然而閩蜀之間歷漢唐時爲有司者得文翁
常袞若人於上焉則於今閩蜀之士所出者常什
之一二矣吳越之間方春秋之衰爲士者得季札
言偃之徒若人於下焉則於今吳越之士所出者

常什之二三矣予始入粵聞今御史與提學者之
至相與俎豆先賢之祠羣粵之士於其宮走數千
里聘名士而教之其他究心不可枚舉則其在上
者蓋已仰承

明天子德意稍稍依文翁常袞

故事相次興舉矣然則其在下者又焉知世無季
札言偃之徒相與崛起其間以應

明天子者

乎嗟乎昔唐陸贄知貢舉而得韓愈宋歐陽修知
貢舉而得蘇軾曾鞏學者至今榮之使二三子能
不負諸執事者文翁常袞之意舉季札言偃之道
而謀且習焉他日出而與吳越閩蜀詩書之澤相

序

卷之十一

九

三百三

發憤頡頏斯則今日之事之幸也予不佞亦與有榮也已否則寧無懼乎哉是時也兵部右侍郎兼僉都御史應某平蠻將軍鎮遠侯顧某方並以天子重臣出擁節旄臨鎮茲土右叅政王某副使公某僉事趙某及副總兵張某叅將王某朱某都司王某鍾某則相與助試事於外者也其他若叅政夏某副使楊某都司李某時則由萬壽表赴京師而左布政使韓某副使沈某以給由行或曰例得以書也故爲之書謹序

送郡太守潞南李公考最序

近代以來二千石之治以最聞者大較出於材指者多而繇學問者少何者古之士務學問學問明而其出而入官者特深仁厚愛之根乎其心順時適俗之達乎其政而其所以怛然入乎民之深易世而不解者以此也后之士學問旣散逸而其綰印綬以從吏也不三四年輒遷徙以去非亟於材指相高不得以自表見衆用耳則飾聲衆用目則飾色故兩漢而下其最著者若東郡潁川南陽渤海之屬往往以其材指之所及而垂之竹帛或以漑田書或以種樹書或以擊盜治獄書斯固吏治

之班班可攷者廼若孔氏之徒單父者流間嘗按
之絕無他可表見以自遺於世而其風流文物歷
千數百年而俎豆之不衰特彈琴不下堂焉耳嗟
乎以此推之則聖門之所務者固在此而未始在
彼也抑可見矣湖郡太守李公晉人也晉之士多
慷慨自喜而公之至也方其始下車而吏民相與
望之溫然有君子之容蓋以學問而移乎風土矣
及其臨政也他郡之以海上羽檄之馳而騷然兵
革者衆矣公一切擯去之獨以愷悌樂易之德與
郡之吏民相搔拊而摩切殆未嘗如彼南陽潁川

之屬求所謂可驚可愕之政者以炫交民之耳與
目而吏民之入而聽政於公也亦若醉醇醴而神
解以去而亦無所謂可驚可愕以播之於口指畫
之於里巷者然而無問識不識相與呼之曰子產
者衆人之母也郡之學士大夫以及輿廝優隸之
賤甚且戴白之老杖几山谷數十年不識郡庭者
皆是也於乎公豈非嚮之所謂怛然入乎民之深
或易數世而俎豆之不置者乎豈今之吏大都彼
各務以其材指相矜而公獨採孔門單父之遺以
揖讓其間者乎公且滿三載以考最行予聞漢二

千石以最聞則天子爲之賜璽書黃金而表爲列卿今國家故事亦間有行之者不知今之執政所上者其能不以彼而以此如予所論否而執政者其又能以予之言移而聞之於天子否乎

叙沈道升四書意

予友人沈君道升所裒四書意二卷一曰筆記二曰口授口授者君所嘗口授門人以孟子章句而門人襍錄而傳之者也口授出而他州邑之學者輒私相善繕寫之不置於是君取而覆之顧自慚非其至者甚且門人或轉韻其上而附之者廼

明年則手大學中庸讀之而日引其所自得於心者注記焉其所祖朱考亭氏傳註及蔡虛齋諸名家之說而獄寃之者釐然矣又明年過學白華樓與予兒積輩讀論語時則君務解脫其所由傳註與諸名家之說而根柢之者什之二三其所不必盡由傳註與諸名家之說而獨得其至者什之六七間或有諸名家之所不窺與傳註之所或窺而不及以言者往往洞朗闢竅若共游夏之徒揖讓乎闕里而憂金石也以故於君所自喜爲最然學者之能知而好之者寡矣伯兄道立氏聞學者相

與傳君之非所自喜而又憫君所自喜者世或不之知也於是刻而傳之遣使來索予題其首予笑而書之曰是奚足恠哉昔楊子雲少時間擬相如爲詞賦及覽其所刺譏則彼固自啗而陋之矣漢之士悅而薦之於天子及他日作法言衆所疑且信者半其最刻畫者太玄爾顧世莫或之好且以覆瓿也於乎君之學方日見其進而未止其所著當有日深於道而不可量者老氏不云乎知我希者貴君固薦於自信人也而又何靳於世之不爲覆瓿乎君或爲覆瓿乎君也君名偉字道升虹野

其別號云

贈左通判受獎序

嘉靖丙辰豫章左君來判吾郡甫旬日而監使者
貌而才之而檄之署烏程縣署烏程不數月而士
悅於庠序民悅於里巷頽然有聲稱而監使者器
之已而入復於 天子按其日月猶例不得以

疏名聞也於是檄而獎之而其寮桂陽蔡君帥諸
州縣長吏屬予書其事嗟乎是豈足爲君書哉古
之以吏治稱者唯兩漢爲盛而予觀兩漢若潁川
南陽渤海而下方其佩二千石印綬遠者二三十

年近者不下十餘年諸官屬並得自辟除其權重
且久故得以盡其材而其政之所由成亦各得以
因其能之所近與其土之所宜以爲惠利於民當
是時天子數爲賜之璽書以旌其能去則史官述
而傳之或以種樹書或以溉田書或以治盜書到
今猶班班可攷也若吾左君氣和而色仁法習而
事練其才鬯且鉅假令授以州郡方城之寄而久
於其職當必能爲惠利於民如古之人豈直監使
者之檄而已倘國家採漢故事他日璽書之賜與
史氏之書並可手而指者顧今之官不過古功曹

之屬也其所署縣綬特累月也公之一切材猷困
於下寮無專責其權不足以展其什之一其所受
牒視事若郵傳然抑亦不足以售其千之一百之
一是奚足以究君施而予固知君深亦安敢前君
之所未及究與監使之不得以聞者而摹畫其什
之一千百之一附古之史氏述而傳之者哉或曰
君得民之驟也如此詩不云乎必有以也監使者
雖不得例以聞采風者不可以無述也已於是乎
書之以俟

贈笠江潘公巡撫河南序

乙卯冬十一月左布政使笠江潘公之入覲也按
故事諸僚佐治供張飲餞北郭道上而因屬善文
詞者次其事蓋倣古者歌四牡之詩以相勸勞也
時浙東西方迫諸倭奴羽檄日夜至而公從烽燧
中驛且馳矣故諸寮佐不得按故事以納於公明
年春左叅政任丘郭公闔諸寮佐貽書來屬坤未
幾報公改副都御史出撫河南予因謂諸公曰諸
公其抑亦知 朝廷所以亟潘公而使之之意也
乎夫中州譬腹心也南並吳越北度雲中朔方以
東屬遼陽譬四肢也頻年以來北困胡南困倭其

所當深入喋血而蹂躪者不可勝數而南爲甚

朝廷固且憐之矣然患特四肢也獨不聞古之醫折肱者脉其血氣寢耗則反而亟察之腹心之間以壅衛之也乎予間嘗從吏兩河數問諸長老諸長老並稱閭里之間一瘁於藩室再疲於供億三絀於戍兵况頃者妖孽尚詔以後師之所處荆棘生焉往往而在千里州郡之間流亡者什二三蓋黯然不勝其丘墟蕭條之色而漸不可支也已公方過浙一切轉輸籌畫固荷公從折肱處砭礪以治之今且佩

天子璽書持節入中原其所當

藩室供億戍兵之數者之間而所以宣其滯孤其
蠹察其陰陽鬯其榮衛以厚 國家之腹心者公
得無意乎昔人嘗以吳楚七國喻瓦解而以匹夫
陳涉之亂秦喻土崩古今來匹夫挺鋤而始亂天
下者東則芒碭北則鄴南則南陽成臯汝鄧並在
公襟帶間幸公有以慮之予故嘗從公遊知公正
直而達明法而廉所至多善政有厚聞於時聞
天子業已虛公卿之位以待公吾固知公之必有
以復於 天子也

賀宮保胡公序

古者兩壘而戰覆其將於矢石之鬪也易而奪其
將於帷幄之筭也難何者當其矢石之鬪可以力
攫可以氣懾而帷幄之間非我之善戰有以歿彼
之心而不吾抗則彼必不聽於我非我之襟度有
以歿彼之心而不我貳則彼必不信於我余故嘗
按傳記若漢高皇帝之百戰以有天下當時所從
諸將若絳灌之屬其矢石所覆不可勝道已而獨
韓王信中行說輩兩人者教單于日夜候漢利害
處漢所當冒頓之患遂與高皇孝文相終始當是
時漢之將有能奪信與說於羶裘之庭而反之中

國則漢可無患矣頃者王直徐海兩人導海上諸夷以蹂躪我中國 聖天子赫然震怒檄天下諸名將及所故稱敢戰之士以嘗之然輒敗去特采百官議懸之以通侯之爵萬金之賞 詔中外情亦亟矣而我總督胡公纍然起而收之予嘗較王直徐海兩人本末按公所以縛兩人者其說有二蓋海之資也悍而直之資也黠海之資也悍故以敢戰力鬪先諸夷而遂爲首難直之資也黠故能以忠信慷慨之氣羈諸夷若屬國然而烽燧所向猶不以逆名由今計之方海之擁夷曾數萬裂

州郡而戰公收卒不滿千人而欲以翱翔其間其
危也固矣然譬則闖虎也餌之以羊豕或檻而縛
之矣當是時公以直爲媒故其弋海也猶易及海
旣縛而直之資又故黠譬之驚弓之猱矣當是時
公以海爲醢故其弋直也尤難而公於其間獨能
後先縛之以獻之於 天子嗟乎公是時豈以

奇掘魁壘之氣與力襲而虜之哉蓋自海上小大
數十百戰以來公故有以歿海之心與直之心而
其開襟所向殺海而不吾怨故及併縛直而不吾
忌耳嗟乎此其際微矣絳灌諸將所不及一謀於

漢而公獨能兩獲之以報 天子顧世之好訾
者猶囂然而起中朝以外洵洵也而卒賴 天
子明聖特下所司議遂及冊公爲元勲於乎盛矣
哉公之功載在石室而郡太守張君徵余文以賀
余特憐公負蓋世之氣以捍 國家而猶爲時所
嫉故特叙其本末以遺後世者如此

贈蕭學諭石潭序

今之求聖人之道者必自孔子孔子明唐虞三代
之德以教天下其所從遊而相與絃歌俎豆於其
側者殆三千矣今其名氏雖不可盡觀記大略皆

天下倜儻之材也而其魯論及史記世家所載尤
爲卓犖魁壘辯莫如子貢文莫如子夏蓋傑然者
衆矣孔子咸不之與顧獨於區區顏回之愚數亟
稱之顏氏沒而道幾絕晚又得一曾參以魯名者
而孔子始稍稍出而刪述易詩書春秋及一貫之
旨以傳之至今若此者何哉唐虞三代之德必其
愚且魯之士而不以外物移其心者然後可與之
共俎豆絃歌之雅而要其至內以養其心外以習
其識而漸之於道也吾邑諭石潭蕭君粵人也粵
旣僻西南萬里絕徼無中州冠帶冶化之俗以巧

月 卷之八
繪於外而其氣則端然質以木行不勝履眇然儒
者也吾始望而貌之而竊異之矣已而扣其深不
能爲今人浮湛而亦不屑爲今人所浮湛而獨以
世之所迂且厭者其二三子誦而習之庶幾講求
其至以不愧於其識焉斯人也豈非嚮之愚與魯
者之似而孔子之所亟稱而深與之者哉嗟乎孔
子沒而門人各以其學分授諸侯之國彼子貢教
於衛子夏教於河西或爲商鞅或爲莊周田子方
再則爲荀卿李斯之徒而孔氏之道遂以毀裂崩
缺於天下而不絕者綫矣甚哉教人者之不可不

懷所擇也而吾安得不於蕭君乎深有感也於是
乎書以歸之

刻籌海圖編序

國家諸夷徼東起遼薊涉雲中上谷西接隴蜀南
及蒼梧象郡百越之地並湮山塹谷以爲界秦漢
來世列亭障繕戍守一切阨塞形勝虛實嚮背世
有圖牒以詮次其事往者有睹來者可鏡也故士
大夫起枹鼓稍稍陳得失形利害以從事而海則
閩廣浙直登萊之間綰波而州者南北萬餘里諸
島旣不得附冠帶之國以自通或貢或絕或內犯

率數十年一見百餘年一見而中國所以斥煥而
守者亦微矣及入我朝始遣信國公經略其間
然列聖以來數十州郡宴然不覩兵革頃者
二三狂孽僉懷內亂往往遠近不支明天子

始下詔徵材官騎士及選宿將以合戰騷然中外
矣而大者覆師小者陷陣逡巡狼狽所嚮無尺寸
之功何者將不審敵兵不服習故也少保胡公來
小大數十百戰稍得芟刈羣兇遂填東南予聞視
公所當蓋世之氣固若天授之者然方其羽檄所
告日數十至公舉杯談笑往往事後當成敗百不

一失蓋繇公結髮入仕勒習戎事又遊宦吾浙也
又一切彼已之阨塞形勝虛實嚮背了然於公襟
帶間故得以擘畫至是耳公一日聞崑山鄭君伯
魯從諸生後好言兵事且憤諸將校不得彼已之
審而輒以身嘗敵也頗爲手次諸夷所入寇與其
將士所當勝負處卽劃然曰兵興來十餘年於茲
並不得片言隻字以系往事吾屬且散去戰陣之
跡當亦尋且零落而他日之舉燧而馳者不猶今
日已乎於是幣聘君過幕府哀次其事君遂首括
諸道之綰海而州與其諸島之錯海而峙者爲圖

諸島之或貢或絕或內和中國所遣使與彼之部
署文字器什戰鬪之習不可以不條見也於是次
之爲事略然諸道之山川夷險異形其所勒習戰
陣異宜也於是分列廣東福建浙江直隸登萊又
各自爲圖而系之以兵防事宜分則散散則不可
按月日而次且諸夷所入寇與其或離或合吾必
泐其情而后可乘謀遣間也於是次之爲年表爲
寇踪分合譜其所當斬馘數十百級以上古人所
謂封之京觀以威敵也於是次之爲大捷考烈士
之戰沒與其婦人女子之殉夫而死所謂兵厲也

於是次之爲遇難殉節考兵將攻守糗糧行伍之間非共士大夫講且肄之不可以明法而有功於是終之以經略予伏讀之惘然嘆曰君之誼亦博且勤也已自王公大人以至處士布衣之俠自

朝廷建畫以至將帥部署之史苟其一言之係乎當世無不句而比之字而櫛之君抑自知猶多繁複龐雜而中所稱述論列亦共爲異同似未可席之施行者顧君方銳於聚矢石以捍國家其旁搜幽討固宜如此表旣完君因自名之曰籌海圖編且嘗手之笑謂曰予之爲是編也卽醫家所

纂古方書是也神之尊百草與方外之牛溲馬
浮吾並籍之以待越人倉公者之出而自擇焉而
又何暇乎其他哉君少多逸氣欲以功名自喜及
不遇適國家多外難卒吐胃中所奇掘如是嗟
乎若君者其史遷所謂虞卿非窮愁不能以著書
自見於世者乎